

'N SEUN VIR ADAM EN EVA!

Van ons Ou Testament redaksie

EDENVERLOREN. – Daar was vanoggend groot opgewondenheid toe die heel eerste mensekind gebore is: 'n fris knapie. Eva het gesê sy naam sal Kain wees, en met groot dankbaarheid bygevoeg: “Ek het 'n man in die wêreld gebring met die hulp van die Here!” Op 'n vraag of sy nog kinders oorweeg, het sy instemmend geantwoord. “Ons het 'n opdrag van God gekry om vrugbaar te wees en te vermeerder, en ons beplan om hierdie keer sy bevele nougeset uit te voer,” het Adam gesê.

Daar is aanvanklik gevrees dat die jong egpaar nie sal kan aanpas by die harde werklikheid van 'n lewe buite Eden nie, maar dit wil tog voorkom of hulle nou hulle voete gevind het. Die verantwoordelikheid wat ouerskap op hulle lê, sal hulle nog meer vasbeslote maak om 'n sukses van hulle taak te maak.

- Lees hiervan in [Gen. 4:1](#).

EK KAN JOU NIE LOS, SÊ GOD

SAMARIA. – In 'n hartroerende pleidooi het die profeet Hosea gister hier die volk Israel tot inkeer geroep. Hy het begin deur die volk te herinner aan God se liefde vir hulle; hoe Hy hulle deur die eeue gelei en gedra het op sy arms. Tog het die volk die rug op Hom gedraai en geweier om tot inkeer te kom.

Hosea waarsku dat daar swaar tye voorlê omdat God hulle in die hande van hulle vyand sal oorgee. Maar, het hy bygevoeg, dit sal nie die einde van die Godsvolk wees nie, want God sal hulle weer terugbring. Met trane in die oë het hy God se boodskap afgelewer: “Maar hoe kan Ek jou prysgee, Efraim? Hoe kan Ek jou laat vaar, Israel? Ek kan dit nie oor my hart kry nie. My liefde brand te sterk ...”

Die profeet Hosea het self deur diep waters gegaan met sy eie vrou, Gomer, 'n prostituut wat dikwels aan hom ontrou is. Tog het hy haar elke keer teruggeneem en haar nie verstoot nie. Dit verklaar dalk waarom hy so geroer is deur God se liefde vir sy ontroue volk.

- Lees hieroor in [Hos. 6](#) en [11](#).

Vrou spring dood vry

Van ons Nuwe Testament redaksie

JERUSALEM. – 'n Jong vrou het vanoggend hier 'n seker teregstelling vrygespring toe 'n rabbi vir haar in die bres getree het en so voorkom het dat sy gestenig word. Sy is op heter daad betrap waar sy owerspel pleeg, en het 'n gewisse dood deur steniging in die gesig gestaar toe die summiere verhoor 'n verrassende wending geneem het.

Die vrou is deur die skrifgeleerdes en Fariseërs na die jong rabbi Jesus van Nasaret gebring, sodat hy die vonnis wat die Wet van Moses voorskryf, kon oplê. Aanvanklik het hy egter niks gesê nie en gebuk en met sy vinger in die grond geskrywe. Toe hulle egter by hom op 'n uitspraak aandrings, het hy met hierdie verbysterende uitspraak gekom: “Laat dié een van julle wat 'n skoon gewete het, eerste 'n klip op haar gooi.” Hierop het die beskuldigers een vir een weggeloop, totdat Jesus alleen met die vrou oorgebly het. Daarop het hy die vrou weggestuur met die woorde: “Gaan maar en moet van nou af nie meer sonde doen nie.”

Simon Petrus, een van Jesus se dissipels, het na die gebeure aan ons verteenwoordiger gesê die hele situasie was 'n set om Jesus in diskrediet te bring. As Jesus die vrou laat stenig het soos die Wet van Moses vereis, sou Hy in die moeilikheid by die Romeinse owerheid wees, aangesien doodsvonnisse slegs deur hulle gevel mag word. Het Hy weer gesê hulle moet haar voor die gehate Romeinse owerheid bring, sou Hy in onguns by die volk kom. “Jesus het nie net hulle strik netjies ontwyk nie, Hy het ook aan 'n gevalle vrou 'n tweede kans gegee,” het hy gesê.

- Lees hiervan in [Joh. 8:1-11](#).
-

Om oor na te dink

Die boek Genesis vertel nie net vir ons die verhaal van die skepping en die sondeval en die gepaardgaande verlies van die Tuin van Eden nie - gelukkig nie! Want Genesis - trouens die hele Bybel - se eintlike fokuspunt bly nie hier op aarde, by ons en ons tekortkominge nie. Nee, die Bybel wil ons oë optrek na Bo, om God se groot liefde en genade vir ons raak te sien, 'n liefde groter as ons sonde, 'n genade veel wyer as ons ontrouheid. Daarom los God nie vir Adam en Eva in hulle ellende nie, maar (ontdek hulle tot hulle verbasing) bly Hy met hulle besig, skenk Hy hulle die wonder om ouers te word. Daarom los Hy nie die Israëliete nie, soos Hy by monde van Hosea so aangrypend verklaar. Daarom los Hy nie die wêreld nie, maar gee Hy sy Seun, "sodat elkeen wat in Hom glo, nie verlore sal gaan nie, maar die ewige lewe sal hê" ([Joh. 3:16](#)). Daarom haal Jesus nie sy skouers op as 'n vrou wat in sonde geval het, deur die owerhede tereggestel wil word nie.

God sal jou en my ook nie uitlos nie. Al het ons, soos Adam en Eva, alle rede om dit te verwag. Gló dit vandag. Dit is die evangelie.

WWJD

So 'n jaar of vyf gelede was 'n baie gewilde item op die Christelike winkelrakke allerlei artikels met die letters **WWJD** daarop aangebring: armband, hangertjies, gordels, T-hemde, pette, Bybelsakke... Ek lees anderdag die grappie van die man wat in die Christelike boekwinkel is en vir die assistent vra waarvoor staan die letters WWJD op die pette wat hulle verkoop. Sy sê toe dit is om jou te help om te weet wat die regte ding is om te doen in 'n bepaalde situasie, want dit staan vir "What Would Jesus Do". Waarop die man antwoord: "Jesus sou nie R129,95 vir daardie pet gevra het nie."

Inderdaad. Wat sou Jesus gedoen het? Hoe kan 'n mens weet? Dis natuurlik wonderlik om jou lewe te wil laat lei deur die voorbeeld van Jesus, maar om te

weet wat Hy in 'n bepaalde situasie sou gedoen het, is nie so eenvoudig nie, en een van die redes daarvoor is dat ons Hom nie so goed ken soos ons behoort of dink nie. Ons lees nie genoeg oor Hom nie; ons fokus nie genoeg op Hom nie; ons praat nie genoeg met Hom nie; ons luister nie genoeg na Hom nie. Kortom, voordat jy 'n intuïtiewe aanvoeling kan kry oor wat Jesus sou gedoen het as Hy in jou skoene was, moet jy 'n baie diep, innige verhouding met Hom hê.

Een van my kleingroepleiers het opgemerk, toe ons praat oor wat dit beteken om navolgers van Jesus te wees, dat ons dan baie meer van die Evangelies moet maak. Dit is immers dáár wat ons van Hom lees, Hom ontmoet in sy woorde en dae en passies, sy omgee en sy verontwaardiging oor dinge wat verkeerd is in die kerk, sy gefokusdheid op sy Vader se wil vir sy lewe.

Ek dink ons moderne mense sukkel met hierdie een, want daar is so baie ander eise en aansprake op ons tyd en aandag wat van verskillende oorde op ons afkom, dat die tyd dikwels ontbreek om aan 'n dieper verhouding met die Here Jesus te werk. Dit is nie maar genoeg om te bid: "Jesus, wees U die Koning in my lewe, Amen," en daar gaan jy nie. Dit gaan om 'n daaglikse verdieping in God se Woord, in besonder die Evangelies waar ons Jesus se woorde en dae kan volg en Hom so beter kan leer ken.

Ek het besluit om elke dag, as deel van my stiltetyd, ook 'n gedeelte uit een van die Evangelies te lees om my te help om Jesus beter te leer ken. Vanoggend lees ek in [Johannes 2:1-11](#) hoe Jesus 'n bruidegom uit sy penarie gehelp het deur nog wyn te maak. Wie van ons sou kon dink dís wat Jesus sou doen?

Wys jou net. Ons ken Hom nooit só goed dat Hy ons nie kan verras nie. En dalk, as ons Hom al beter leer ken, neem Hy ons óók op hierdie verrassende paaie van blydskap en die lewe vier.

Dís waaroor dit gaan: dat ons Hom beter en beter sal leer ken. Dán eers kan ons die vraag van WWJD regtig begin antwoord en begin leef.